

**МОНГОЛ УЛСААС ГАДААД УЛСАД СУУГАА ЗАРИМ ЭЛЧИН САЙДЫГ ЭГҮҮЛЭН
ТАТАХ, ТОМИЛОХ САНАЛЫГ ЗӨВШИЛЦСӨН ТАЛААРХ АЮУЛГҮЙ БАЙДАЛ,
ГАДААД БОДЛОГЫН БАЙНГЫН ХОРООНЫ САНАЛ, ДҮГНЭЛТ**

2024 оны 01 дүгээр
сарын 10-ны өдөр

Улаанбаатар
хот

Илтгэгч нь: Улсын Их Хурлын гишүүн Б.Энх-Амгалан

Улсын Их Хурлын дарга, эрхэм гишүүд ээ,

Монгол Улсын Үндсэн хуулийн Гучин гуравдугаар зүйлийн 1 дэх хэсгийн 5 дахь заалт, Монгол Улсын Ерөнхийлөгчийн тухай хуулийн 14 дүгээр зүйлийн 3 дахь хэсэг, Дипломат албаны тухай хуулийн 16 дугаар зүйлийн 16.1 дэх хэсэгт заасныг үндэслэн Монгол Улсын Ерөнхийлөгчөөс Монгол Улсаас Бүгд Найрамдах Солонгос Улсад суух Онц бөгөөд Бүрэн эрхт Элчин сайдаар Сүхээгийн Сүхболд, Монгол Улсаас Польш Улсад суух Онц бөгөөд Бүрэн эрхт Элчин сайдаар Гунаажавын Байгалмаа, Монгол Улсаас Шведийн Хаант Улсад суух Онц бөгөөд Бүрэн эрхт Элчин сайдаар Цэрэндоржийн Мөнх-Өлзий, Монгол Улсаас Нэгдсэн Үндэстний Байгууллагын дэргэд суух Байнгын төлөөлөгчөөр Нямдоржийн Анхбаяр нарыг томилох тухай болон Монгол Улсаас Бүгд Найрамдах Польш Улсад суугаа Онц бөгөөд Бүрэн эрхт Элчин сайд Бархасын Дорж, Монгол Улсаас Шведийн Хаант Улсад суугаа Онц бөгөөд Бүрэн эрхт Элчин сайд Түвдэндоржийн Жанабазар, Монгол Улсаас Нэгдсэн Үндэстний Байгууллагын дэргэд суугаа Байнгын төлөөлөгч Воршиловын Энхболд нарыг эгүүлэн татах саналыг 2024 оны 01 дүгээр сарын 05-ны өдөр Улсын Их Хуралтай зөвшилцөхөөр ирүүлснийг Аюулгүй байдал, гадаад бодлогын байнгын хороо 2024 оны 01 дүгээр сарын 10-ны өдрийн хуралдаанаараа хэлэлцлээ.

Байнгын хорооны хуралдаанаар дээрх асуудлыг хэлэлцэх үед Улсын Их Хурлын гишүүн Д.Ганбат Гадаад харилцааны сайд Б.Батцэцэг болон яамны холбогдох ажилтнууд эрхэлсэн ажлаа амжилттай сайн гүйцэтгэж байгааг онцлон тэмдэглээд, бэлтгэгдсэн дипломат ажилтнуудыг Элчин сайдад нэр дэвшүүлсэн байна гээд, шинээр томилогдох Элчин сайд нараас цаашид иж бүрэн стратегийн түншлэлийн хүрээнд Солонгос болон Европын Холбооны Улс орнуудтай чөлөөт худалдааны гэрээ байгуулж ажиллах, тухайн улс оронд ажиллаж, амьдарч буй өөрийн орны иргэдийн эрх ашгийг хамгаалах талаар ямар ажил хийхээр төлөвлөж буйг тодруулан асууж, хариулт авсан болно.

Улсын Их Хурлын гишүүн Ц.Сэргэлэн нэр дэвшигч нарын боловсрол мэдлэг, ажлын туршлага хангалттай сайн байгаа тухай, Монгол Улсын Үндэсний аюулгүй байдлын язгуур ашиг сонирхлыг хангахад чухал үүрэг хүлээж байгааг анхаарч ажиллах, Улсын Их Хурлын гишүүн Д.Цогтбаатар гадаад бодлогыг эдийн засагжуулах, худалдааны үр ашгийг нэмэгдүүлэх талаар судалгаа хийсэн эсэх, гадаад бодлогын уламжлалт шинж чанарыг хадгалж цаашид үргэлжлүүлэх, гадаад улсад амьдарч буй иргэдтэйгээ хүнлэг, ёс суртахуунтай харьцах талаар анхаарах, Улсын Их Хурлын гишүүн Б.Баттөмөр гадаад харилцааг эдийн засагжуулах, хөрөнгө оруулалтыг татах, худалдааны бодлогоо сайжруулах, аялал жуулчлалыг нэмэгдүүлэх, эх орноо сурталчлахад анхаарах шаардлагатай байгаа талаар, Улсын Их Хурлын гишүүн Н.Энхболд нэр дэвшигчид нь мэргэжлийн дипломатч, салбартаа олон жил ажилласан, ажлын туршлага өндөртэй хүмүүс байгаад талархаад, суугаа орондоо иргэдийнхээ сонгох, сонгогдох эрхийг хангах талаар идэвх санаачлагатай,

иргэдтэйгээ нягт хамтран ажиллах шаардлагатай болохыг нэр дэвшигчдэд анхааруулсан болно.

Улсын Их Хурлын гишүүн Б.Энх-Амгалан нэр дэвшигчдийг дэмжиж байгаагаа илэрхийлээд, эгүүлэн татсан Элчин сайд нарыг Монгол Улсаа төлөөлөн гадаадын улс оронд ажиллах хугацаандаа хийсэн ажлын тайлан, үр дүнгээ Байнгын хороонд тайлагнадаг байх, идэвх, санаачлагатай, сайн ажилласан Элчин сайд нарыг шалгаруулдаг, үнэлдэг тодорхой шалгуур үзүүлэлттэй болгох, дээд, өндөр түвшний айлчлал, арга хэмжээний давтамжийг улам нэмэгдүүлэх, гадаад улс оронд амьдарч буй иргэдтэйгээ мэдээлэл солилцох, нягт уялдаатай байх талаар анхаарч ажиллах нь зүйтэй гэв.

Монгол Улсын Ерөнхийлөгчөөс Улсын Их Хуралд зөвшилцөхөөр ирүүлсэн Сүхээгийн Сүхболдыг Монгол Улсаас Бүгд Найрамдах Солонгос Улсад суух Онц бөгөөд Бүрэн эрхт Элчин сайдаар, Гунаажавын Байгалмааг Монгол Улсаас Польш Улсад суух Онц бөгөөд Бүрэн эрхт Элчин сайдаар, Цэрэндоржийн Мөнх-Өлзийг Монгол Улсаас Шведийн Хаант Улсад суух Онц бөгөөд Бүрэн эрхт Элчин сайдаар, Нямдоржийн Анхбаярыг Монгол Улсаас Нэгдсэн Үндэстний Байгууллагын дэргэд суух Байнгын төлөөлөгчөөр тус тус томилохыг саналыг Байнгын хорооны хуралдаанд оролцсон гишүүдийн олонх дэмжсэн болно.


Түүнчлэн Монгол Улсаас Бүгд Найрамдах Польш Улсад суугаа Онц бөгөөд Бүрэн эрхт Элчин сайд Бархасын Дорж, Монгол Улсаас Шведийн Хаант Улсад суугаа Онц бөгөөд Бүрэн эрхт Элчин сайд Түвдэндоржийн Жанабазар, Монгол Улсаас Нэгдсэн Үндэстний Байгууллагын дэргэд суугаа Байнгын төлөөлөгч Воршиловын Энхболд нарыг эгүүлэн татах саналыг Байнгын хорооны хуралдаанд оролцсон гишүүдийн олонх дэмжлээ.

Улсын Их Хурлын эрхэм гишүүд ээ,

Монгол Улсын Ерөнхийлөгчөөс Улсын Их Хуралд өргөн мэдүүлсэн Элчин сайд нарыг эгүүлэн татах, томилох саналыг зөвшилцсөн талаарх Аюулгүй байдал, гадаад бодлогын байнгын хорооны санал, дүгнэлтийг хэлэлцэн шийдвэрлэж өгөхийг Та бүхнээс хүсье.

Анхаарал тавьсанд баярлалаа.

**АЮУЛГҮЙ БАЙДАЛ, ГАДААД
БОДЛОГЫН БАЙНГЫН
ХОРООНЫ ДАРГА**



Б.ЭНХ-АМГАЛАН